

ŽIVOT S POPLAVAMA

ČLANOVI UDRUŽENJA „ABC“ IZ BIHAĆA SU ONI KOJI SU PRVI PRITEKLI U POMOĆ STANOVNIŠTVU POPLAVLJENIH PODRUČJA U BOSNI I HERCEGOVINI, MAJA 2014. GODINE

Udruženje „ABC“ iz Bihaća jedan je od kolektiva koji se u prvim trenucima poplava aktivirao i uključio u aktivnosti kada je u pitanju pomoć poplavljenim područjima. Prošle su dvije godine kako ova mala organizacija i njeni prijatelji i dalje rade i iscrpljuju sve svoje resurse pri pomaganju onima kojima je pomoć zaista potrebna.

Maja 2014. godine, mediji iz cijele Bosne i Hercegovine javljali su o hrabrim i humanim momcima iz Bihaća, koji su bez razmišljanja krenuli put poplavljenih gradova, kako bi pomogli unesrećenom stanovništvu.

Neki od članova ovoga Udruženja su u prvim danima ove velike vremenske kataklizme, zajedno sa skiperima „Una-Aqua centra“, radili na spašavanju unesrećenoga stanovništva Doboja i Maglaja. Priča je ovo o mladićima koji su dva dana spašavali Dobojljice i Maglajljice. Spašavali su djecu, starce i bolesne iz poplavljenih područja. Donosili im hranu, lijekove... Bili su i skiperi i kajakaši i novinari i spasioci, ali prije svega ljudi koji su spremni ugroziti vlastite živote kako bi spasili tuđe. Jedan od njih bio je i Dinko Hadžović, koji nam je ispričao svoja iskustva prilikom pomoći u poplavljenim gradovima i prikupljanju humanitarne pomoći za stanovništvo, nakon poplava.

Aktivnosti Udruženja „ABC“ i danas su vezana za poplave. Uključeni su u projekat "Mrežu Brana“, te vrše monitoring utroška sredstava namijenjenih za obnovu šteta nastalih u poplavama 2014. godine. Dinko nam je ljubazno odgovorio na naša pitanja, prisjećajući se tih teških i dirljivih trenutaka.

NELS: Za početak, molimo Vas da nam se ukratko predstavite

DINKO: Moje ime je Dinko Hadžović, rođen sam u Bihaću, gradu na Uni, 1985. godine i apsolvant sam na Pravnom fakultetu Univerziteta u Bihaću. Također, član sam Udruženja "ABC" iz Bihaća koje slovi za jednu od najaktivnijih nevladinih organizacija na području Unsko-sanskog kantona.

NELS: Danas, tri godine poslije, možete li se prisjetiti kroz šta ste sve prolazili tih dana?

DINKO: Dvije godine po završetku jedne od najvećih prirodnih katastrofa koja je zahvatila našu zemlju, poplava, sjećam se više različitih aktivnosti koje sam kroz Udruženje "ABC" vršio, a u cilju pomaganja stanovništvu koje je tih dana izgubilo sve što je godinama stvarano. I jedno što mogu reći, a da se tiče mene lično, jeste to da sam tih dana, zajedno sa članovima Udruženja "ABC" i volonterima koji su nam se priključili, prevalio puno kilometara i jako malo spavao.

NELS : Gdje, na koji način i kome ste pomagali ?

DINKO: Tih dana Udruženje "ABC" i "Una-aqua centar", rafting agencija, stavili su sve svoje resurse na raspolaganje, pa su prvo skiperi "Una-aque" otišli direktno u Doboju i faktički prvi spašavali ugroženo stanovništvo, dostavljali hranu i vršili razne aktivnosti umanjivanja potencijalnih posljedica po zdravlje i živote ljudi u tome gradu. Paralelno s njihovim aktivnostima na terenu, Udruženje "ABC" pokreće akciju prikupljanja humanitarne pomoći za stanovništvo ugroženo poplavama, koja je trajala nekoliko dana. Humanitarna pomoć prvo je dostavljena Sanskom Mostu i Ključu koji su tih dana bili najviše ugroženi kada je u pitanju USK. Zatim je pomoć dostavljena Prijedoru, a nakon toga i Maglaju, Žepču te mnogim drugim manjim mjestima.

NELS: Kakve štete je voda napravila, kako vama tako i žrtvama ?

DINKO: Ja lično nisam imao šteta nastalih tokom poplava, ali kolega Armin Amidžić, vlasnik "Una-aqua centra" je probušio čamce tokom akcije u Doboju, no to je sanirano. Ovim putem bih istakao i svoju aktivnost na projektu "Mreža Brana", kojeg vodi Centar civilnih inicijativa. "Mreža Brana" sastavljena je od dvadesetak organizacija sa područja cijele BiH koje vrše monitoring utroška sredstava namijenjenih za obnovu šteta nastalih u poplavama 2014. godine. S obzirom da sam se kao lokalni koordinator za područje USK-a, tačnije općina Sanski Most, Ključ i Bosanski Petrovac, te grad Bihać, bavio ovim pitanjem i terenskim obilascima korisnika donacija krajem prošle i početkom ove godine, mogu vam reći i neke tačne podatke o šteti na području našeg kantona. Najviše štete zabilježeno je na području općine Sanski Most, tačnije 10.705.804,00KM, zatim slijedi Ključ sa 2.051.090,66KM, a Bosanski Petrovac pretrpio je štetu u visini 259.052,26KM. Na žalost, Uprava grada Bihaća nije bila otvorena za suradnju i nisu nam dostavili tačne podatke o iznosu šteta na području grada. Osim ove tri

općine i grada Bihaća, određenu štetu su pretrpile i druge općine USK-a, osim Bosanske Krupe koja je jedina ostala pošteđena razaranja.

NELS: Šta je najgore što ste proživjeli tih dana, a što Vam je ostalo u sjećanju ?

DINKO: Maglaj je vjerovatno grad koji je pretrpio najveće štete, a kome je Udruženje "ABC" dostavilo pomoć u vidu lijekova i drugog medicinskog materijala. Međutim, na većinu nas koji smo tih dana putovali širom BiH i dostavljali pomoć najviše utiska je ostavilo Željezno polje, koje je zbog stanja u kome smo ga zatekli, velikog broja klizišta i kuća zasutih šljunkom i muljem do skoro trećeg sprata, izgledalo zastrašujuće.

NELS: U tim tmurnim danima, da li ima nešto lijepo da biste istakli, kao npr. sklapanje novih prijateljstava... Kakav je, zapravo osjećaj pomagati drugima ... ?

DINKO: Tih dana bih istakao jedno poznanstvo kojeg su članovi Udruženja "ABC" ostvarili sa gospodinom Bećom Jukićem, inače Bišćaninom koji živi i radi u Austriji, i članovima organizacije "Vorarlberg Hilft-Hilfsaktion für Flutopfer in Bosnien" koji su preko Udruženja "ABC" donirali velike količine robe, prehrambenih i drugih artikala širom BiH i ovim putem im se još jednom zahvaljujem na suradnji i ukazanome povjerenju.

NELS: Hvala Vam gospodine Hadžović, bilo nam je veliko zadovoljstvo provesti u Vašem društvu ove ugodne trenutke. Zbilja je čast upoznati čovjeka poput Vas. Na kraju ostaje nada da se ovakve situacije više neće ponoviti.

DINKO: Hvala Vama na vašem trudu da ukažete na značaj i nužnost humanitarnog rada prilikom ovakvih ekoloških katastrofa.